

Date – 29/10/2025

Time - 7:30 -7:40 Hrs

AKASHVANI AIZAWL
REGIONAL NEWS BULLETIN
HEADLINES (MORNING)

1. Mizoram sorkarin Forest Conservation Amendment Act 2023 a pawm tak sut leh tura nawr nan tukin dar 6 atang khan MNF Party chuan Mizoram pum huap Total Bandh an huaihawt.
2. Congress Party chuan FCAA, 2023 chu ram venhimna chhuanlama hmarchhak biala state tenau zawk, Northeast Minority State te paldarh tumna hmanrua a ni an ti.
3. Union Cabinet chuan 8th Central Pay Commission Terms of Reference te a pawm.
4. Union Railway Minister Ashwini Vaishnaw chuan Railway official zawng zawngte chu Cyclone Montha avangin inralrinna a tul ang anga ti turin a hriattir.

<><><>

BANDH

Mizoram sorkarin Forest Conservation Amendment Act 2023 a pawm tak sut leh tura nawr nan tukin dar 6 atang khan MNF Party chuan Mizoram pum huap Total Bandh an huaihawt.

Akashvani Aizawl zawhna chhangin MNF General Secretary, FCAA donaa Action Committee-a Secretary ni bawk, Pu David R Lalsawmtluanga chuan zing dar 6 atanga tlai dar 4 thleng an buatsaih dawn a, Political party leh NGO hrang hrang te hnenah thlawp tura an sawm angin thlawpna an dawng tha a, thenkhat chuan tawngkam mai ni lovin ziak ngeia thlawpna te pawh an dawng a ti a, Mizoram Business Coordination Committee, leh MIMA tamin sumdawng pawl hrang hrang te, All Mizoram Commercial Vehicle Union tamin lirtheia eizawng pawl hrang hrangte, zirlai pawl te leh Mizoram university-a zirlai leh zirtirtute hnen atang pawhin thlawpna an dawng tih a sawi a ni.

Hetihlai hian bandh huaihawt tur avanga mahni lo inhmakhua thlawhna leh rel ticket la tawh tamin mi 200 chuangte chuan MNF office ah special permit an dil angin an pe tawh a ti a, thlawhna leh rel hmanga haw tur te erawh chu Total Bandh tawp hun nghak turin a chah a, chutihrualin dam lohna leh thihna avanga lo haw te chu special permit chhungah ngaihnhathiam turin duty zawng zawng an in hrih tih sawiin, Total Bandh hlawhtling tak an neih a ring tih a sawi.

FCAA 2023 chuan Mizorama cheng mipui, ramngaw leh nungchate inhumhimna India constituion Article 371G chu engmah lovah a chantir tak avangin Mizoram leilung leh a mipui zawng zawngte an him tawh lova, Mizoram sorkar chuan FCAA chu a sut leh hma loh chuan hma an la dawn tih a sawi.

Mizorama pawl hrang hrang inzawmkhawm, Joint Civil Society of Mizoram (JCM) pawhin n thuchhuah siamin, FCAA 2023 duhloh lantirna leh hnuk let tura phutna atan MNF party in “Total Bandh” an huaihawt tur chu an thlawp an ti a, Mizo mipui zawng zawng, NGO hrang hrang leh Political Party zawng zawng te chu he “Total Bandh” hi thlawp turin an ngen a ni.

FCAA 2023 chu Mizoram leh hnam tan a tha lo takzet a, tun maiah ni lo, nakin zelah Mizoram leh hnam ralna kawng sialtu ah an ngai tih sawiin, Mizoram Assembly in FCAA 2023 a lo pawm tawh chu sut leh ngei turin Mizoram Sawrkar an ngen nawn leh tih an sawi a ni.

PC Party pawhin thuchhuah siamin, Bandh an thlawp thu an sawi a ni. An Party Vice President, Dampa by election-a party candidate ni bawk Pu K Zahmingthanga chuan an Party Office-ah FCAA chu Mizoram tana hlauhawm tak, hnam leh sakhaw himna tichhe thei a nih thu a sawi a, ZPM kaihhruai sorkarin Mizorama hman tura a pawm chu pawl a tih thu leh he Dan chi PC Party chuan a duh lova, sut leh ngei tura sorkar a phut thu te a sawi a. He Dan sut leh a nih theihna atana hmalakna apiang PC Party in a thlawp thu sawiin, naktuka MNF party in hma a lakna tur pawh party in a thlawp thu a sawi a. Bandh hlawhtlinna atana mahni remchan anga che chhuak turin party mi te a sawm a ni.

<><><>

MPCC

Mizoram Pradesh Congress Committee, MPCC chuan FCAA, 2023 chu ram venhimna chhuanlama hmarchhak biala state tenau zawk, Northeast Minority State te paldarh tumna hmanrua a ni an ti.

Nimina Aizawl Press Club-a thuhthar thehdarhtute an kawmnaah MPCC thupuangtu Pu Lalbiakzama chuan . Sorkar Laipuiin Manipur leh Ladakh a sawisak duh dan enin ngaih a tha thei lo a ti a, National Security leh Strategic Importance issue te chu sorkar tan hmanraw tangkai leh duh zawng tih theihna chhuanlam pawimawh leh tha ber a ni thin tih hi Police a kum 32 zet a thawh chung khan a hre ve a a hriat thu a sawi bawk a ni.

Mizoramin Forest (Conservation) Amendment Act (FCAA), 2023 a pawm tak avangin sorkar laipui chu Mizoram chhungah duh ang anga tal theih nan 'Blanket Approval' a lo pe reng a ni thei em tih chhut turin Mizo mipuite an ngen tih sawi bawkin, FCAA Dan thara Section pawimawh lai ber, International Border atanga Km 100 ah he DAN in a huam lo ang a tih hmunte hman theih dan 'Terms and Conditions' a siamah chuan Central Sorkar-in kaihhruaina a siam thin ang zel a ni ang tiin a tlip a ni a ti a, he kaihhruaina bak hi 'Rules' dang an hmu lo tih sawiin, FCAA, 2023 Provision in a huam ve loh takah chuan Rules pawh Sub. Sec.(3) bak chu siam ngai an ti rih lo em ni tih zawhna a zawt a, tuna Mizoram sorkar chuan Restricted Tender Blanket Approval a pek thin ang mai in FCAA 2023 kan lo adopt hian Central sorkar chu Mizoram chhungah duh ang anga tal theih nan 'Blanket Approval' kan lo pe ve reng a ni thei em tih chhut ngun turin Mizo mipuite a sawm a ni.

MPCC Spokeperson chuan he dan siamthatah hian Chief Minister Pu Lalduhoma sawi anga state sorkar thuneihna pek belhna awm reng reng a hmuzo lo tih sawiin, Sakawrdai-a YMA General Conference neih zawh takah khan Chief Minister in kilometre 10 leh hectare 5 tia a sawi te chu a sawi sual angah ngaihsak mai tha a tih thu a sawi a, Mizoram chu a vang lam zaulai berah kilometre 116 anga ngaih a ni a, khawthlang leh khawchhak atangin kilometre 100 pawhtawn chuan a tuam hneh khawp ang a ti a ni.

CM

Chief Minister Pu Lalduhoma Committee on "Hnam Tobul Zawn Chhuah" Chairman hova nimina thukhawm chuan, a taka hnathawktu tur mithiam dap khawm hna thawk turin Art & Culture Department chu hma lo la turin an ti.

Chief Minister chuan, Sorkarin a pawmpui tlak hnam tobul leh chanchin kimchang zawk, Mizo hnam peng hrang hrangte huapzo, tunlai thiamna thar ber ber te hmang ril zawka chhui tul an ti tih sawiin, a tul a nih chuan hnam dang mithiam rawih huamin, scientific taka chhui a tulna kawngah pawh inhawng takin hma an la dawn, a ti.

Art & Culture Minister Pu C. Lalsawivunga chuan he hmalakna hi mithiamte rinchhan hmalakna a ni a ti a. A thiam leh tui, inpe taka hnathawk thei tur an mamawh tih a sawi a ni.

Meeting chuan, History chhui dan peng hrang hrang hmanga hmalak a nih theih nan a taka hnathawktu tur mithiam fawmkhawm phawt ni se an ti a. Minister Pu C. Lalsawivunga kaihhruaina hnuaiah Art & Culture Department chuan an tam lam bituk nei lovin hnathawk thei tur mithiam lo zawng khawm hmasa se, an inpeih hunah thutkhawm leh ni se, an ti.

An hnathawhna tur sum leh pai an mamawhte hi Ministry of Tribal Affairs hnuaia Support to Tribal Research Institute atanga hmuh theih beisei a ni.



CBC OUTREACH PROG

Hmankhat daih plastic hlauhawmna leh hmang lo tura inzirtirna chuCentral Bureau of Communication (CBC), Field Office Aizawl chuan nimin khan Aizawla Govt. J.L. High School-ah an buatsaih a,

An tum ber chu zirlaite leh zirtirtute plasctic atanga thilsiamin an chhehvel chenna a tihblawhhlawh theih dan leh mihring tan a hlauhawm theih dan zirtir a ni a, JL High School Headmaster Pu C. Ngurthantluanga chuan zirlaite chu plastic hman loh chu mawhphurhnaa laa zirna in leh a chhehvel bakah an chhungkhat leh thenawm khawveng te pawh tihhmuh tura a duh thu a sawi a ni.



TERRITORIAL ARMY

20th Battalion Assam Rifles te chuan nimin khan Assam Rifle camp, Siaha-ah MJA member te leh NGO te chu Mizoram Territorial Army lak tur chungchangah inkawmhona an neih pui a.

Company Commander Major Sukhraj Singh chuan territorial army lak thar tur chu a tha hle a, Indian Army dang angin ramchhung hmun hrang hrangah post an ni dawn lova, Mizoram chhungah chauh post an ni dawn a ti. Hei bakah hian Indian army ten hamthatna a dawn tur ang a dawn vek dawn thu a sawi bawk a. Siaha District atanga tel duhte tan Aizawl Rajiv Gandhi Stadium-ah recruitment neih a ni dawn a, Siaha district atanga tel duhte tan pre training pek bakah exam inpuahchahna tan class pek an inhuam thu a sawi bawk a ni.

November ni 15 atanga November ni 25 chhung Territorial Army lak runpui hi Rajiv Gandhi Stadium, Aizawlah neih a ni dawn a. November ni 22-23 chhungin hmeichhe tan bik buatsaih a ni dawn a, hei bakah hian 24-25 November chhungin Nu emaw Pa emaw India Sipaia tang duh te tan buatsaih a ni dawn bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



GST REFORMS

Kumin September ni 22 atanga a taka GST dan thar hman tan a nih hnuah dawr thenkhatah thil man ngai a zuar an la tam chhan chu GST registration nei lova sumdawng an tam vang ni a sawi a ni.

Hemi chungchanga Akashvani Aizawl zawhna chhangin GST practitioner Pu R Lalengliana chuan GST nei leh nei indawrtawnna chu Business to Business, B2B tia sawi niin, bungrua an in lei tawnin tax invoice a, a tax chu a thlaleh ni 14-ah ITC GST portal-ah Tax portion zawng a let leh thin a, hei hi sumdawng tan a pawimawh hle a, ITC an khawl khawm hmangin sorkara an tax chhunluh tur a tlahniam thin a ti a, hetihlai hian Mizorama dawrkai leh sumdawng tam zawkte chu GST registration nei lo, wholesale lian hnenah wholesale rate a an bungraw zawrh tur te an lak thin avangin ITC let leh tur an neih ve tawh loh avangin a tlawma hralh thei dinhmunah an ding ve lo a ti a, hei hi GST dan thar hnuaiah dawr leh sumdawng thenkhat ten thil man an la tihtlawm ve loh phah a ni a ti. Mipuite pawh GST dan thar hman hmaa thil man leh GST dan thar hnuaia sorkar laipuiin thil man a tih hniam te chu ngaihven a, an dikna chanvo hria a, man tlawm zawkin thil an lei em tih te hriat tum turin a chah a, GST danah cheng 200 chin thil an lei chuan dawrkaite hnenah tax invoice an dil theih avangin a theih chin chinah tax invoice dil thin turin a chah a ni.

Pu R Lalengliana chuan GST dan thar hi mipuiin an hlawkpui ber dawn a ti a, GST registration nei sumdawngte tan hloh tur pakhatmah a awm lo tih sawiin, sorkar chu a chan tam ber tur a ni thung tih sawiin, sorkarin GST a lakkhawm thin a tlahniam dawn tih a sawi a ni.

<><><>

8TH PAY COMMISSION

Union Cabinet chuan 8th Central Pay Commission Terms of Reference te a pawm. Union I&B Minister Ashwini Vaishnaw chuan vawiina New Delhi-a Cabinet meeting chuan he thu hi a pawm thu sawiin Commission hian thla 18 chhungin an rawtna te an thlen dawn a. Central 8th Pay Commssion ah hian Chairperson, Part Time member pakhat leh Member secretary an awm a ni.

Hei bakah hian Union Cabinet chuan Rabi Season 2025-26 chhunga Phospatic leh Potassic fertiliser tana Nutrient Based Subsidy rate a pawm bawk a. Pu Vaishnaw chuan he subsidy atan hian cheng vaibelchhe sing 3 sang 7 leh 952 a pawm a ti a. October ni 1 atangin he rate hi hman a ni ang a ti.

<><><>

CYCLONE MONTHA

Union Railway Minister Ashwini Vaishnaw chuan Railway official zawng zawngte chu Cyclone Montha avangin inralrinna a tul ang anga ti turin a hriattir. Pu Vaishnaw chuan abik takin Andhra Pradesh, Odisha leh Telangana chhehvel vil uluk turin a hriattir bawk a ni.

Puan tawh angina Cyclone Montha chuan Andhra Pradesh ah ruah, thli leh tuilian a thlen mek a. Thlipui hi hmarlam atangin hmarthlang lam panin a tleh a. State sarwkar chuan chhanchhuah hna leh chhawmdawl hna ngawrh takin a thawk nghal a. Cyclone tuar thei tura ngaih thingtlang khuaa chengte chhawmdawlna camp lamah thiarchhuah niin chaw leh tuite pek an ni.

Odisha ah pawh khan state chhung chhim lam leh tuipui kamahte ruah a sur nasa a. Hei hi Cyclone Montha in a nghawng niin Chief Minister Charan Majhi chuan Bhubaneswar ah high-level reiview meeting a ko nghal a. Cyclone Montha tleh tur atana inpuahchahnate an thlirho a ni.

